



Siverth K. Heilmann

UPA 2024/70-1&

Atassut

UPA 2024/100-1

16. April 2024

Naalakkersuisut peqquneqarnissaannii Inatsisartut aalajangiiffigisassaattu siunnersuut Naalakkersuisut ataatsimiititaliarsuarmik pilersitsissasut pinerlussimanermi pillaasarnermut inatsisimmik suliarinnittussamik aamma eqqussisussamik. Ataatsimiititaliarsuup suliariumaagai inatsisartut ukiaaneranani ataatsimiinnerminni 2025-imi saqqummiunneqassapput.

(Inatsisartunut ilaasortaq, Kuno Fencker, Siumut)

Aamma

Kalaallit Nunaanni pillaasarnermut inatsit eqqunnissaanut piareersaatit suliniutillu pisariaqartut aallartinnissaanut tunngavissamik pilersitsisussamik aallartisartoqarnissaa anguniarlugu, Naalakkersuisut rigsmyndighed attaviginissaanut piumaffigineqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anna Wangenheim, Demokraatit)

Siullermik inatsisartunut ilaasortap, Kuno Fencker, Siumut, siunnersuutaanut qujanaq, imatullu Atassummiit oqaaseqarfigissavarput.

Inatsisiliortutut pisussaaffeqarpugut, pinerluttulerinermermi inatsisitta, inatsisartuniit Naalakkersuisut allannguiniarnernut Folketingimut apuussaqaarnissaannut pisinnaatinneqassasut. Allannguiniartilluta soorunami ileqquuvoq, inatsisinik Nunatsinnullu pissutsinik ilisimasaqarluartut nalilersuinernut pitsaaanerpaaq anguniarlugu peqataatinneqartarnerat tusarniaasoqartarnerallu.

Ukiuni kingulliunerusuni malunnarsiartuinnavissimavoq, inatsit unioqqutinneqartoq pinerluttulerinermermi imaluunniit eqqartuussisarnermermi inatsimmiippat, oqaasertaliunneqartut qallunaatuumiit kalaallisut muminganilluunniit paasiuminaalligaluttuinnartut.

Pinerluttulerinermermi inatsimmi, suna suulluunniit unioqqutissimaneranik politiinut nassuertoq, aatsaat eqqartuussisarnermermi inatsit malillugu pineqaatissinneqartarput, suliarlu inaarsarneqartarluni. Soorunami pineqaatissinneqartoq, imminut tatigisaminilluunniit illersuisoqarnissaminik periarfissinneqartarpoq.

Oqaatigineqartarpoq Kalaallit Nunaanni, sakkukinnerpaamik pinerluttulerinermi nunarsuarmi inatsiseqartugut. Malugisarpaput aamma eqqartuussisarnermut inatsisitta, qanoq unioqqutitsinerit sakkortutiginerat sakkukinneralluunniit apequtaatippallaarnagit, “inuppalaartumik” eqqartuunneqartarnerat.

Inatsisinik unioqqutitsisarnerni ilaatigut inuit pinerliffigineqarsimasut ikiorneqarnissaminnut siunnersorneqarnissaminnulluunniit, taarsiivigitissinnaanerat kisiat eqqarsaatiginnikkaluarlugu pisariaqartittaraat malunnarpoq.

Siunnersuuteqartup tikkuarpaa, pinerluttulerinermi inatsimmi “pillaasarneq” atorineqanngitsoq tamanna ilumoorpoq. Kiisalu inuiaqatigiit akornanni unioqqutitsinernut pineqaatissiisarnerit ataqatigiinnginnerat oqallisaasartoq.

Siunnersuuteqartup inatsisit oqaaseqatigiineqartartullu imminnut naapertuuttannginneranik oqariartuutigisai paasinarluarput aammalu naleqqussaasoqartariaqartoq tunngaviatigut Atassummiit isumaqatigisinnaavarput.

Taamaakkaluartorli suliap aappassaaneerneqartigani, inatsiseqarnermut ataatsimiititaliami Atassummi oqaaseqaatigut ilanngullugit nalilersuisoqassasoq inassutigaarput aammalu ilumut pisariaqarnerisooq ataatsimiititaliarsuarmik pilersitsinissaq.

Taavalu immikkoortoq tullianut, inatsisartuni ilaasortap Anna Wangenheim, Demokraatit siunnersuutaanut qujariarluta, imatut naatsumik Atassummiit oqaaseqarfigissavarput.

Aalajangiiffigisassatut qulequtsiunneqartoq ilumut siunnersuuteqartumiit, Kalaallit Nunaanni pillaaasarnermut inatsit eqqunniarparpuut? Imaluunniit pinerluttulerinermi inatsiserput sukateriffigis-sanngilarpuut?

Taamatut aallarniuteqalaarpunga, oqaaseq “pillaasarneq” pingaartumik nunani allani toqumik pillaaasarnernit il il tusartuakkagut isumalersorneqarsinnaanera ernumanartutut naleqqutinngitsutullu isigigakku.

Siunnersuuteqartulli tunngavilersornermini unioqqutitsisarnerpasuit nalunaarsorneqartarsimasut aammalu pinerluffigineqarsimallutik eqqugaasartut pillugit oqariartuutigisai ilumoortut iliuseqarfigissariaqarigut sukaterisariaqarnerpullu Atassummiit isumaqataaffigeaarput.

Siorna Atassummiit suaarutigivarput pillaaasarnermut inatsiseqalertariaqartugut. Nammineerlunga oqaaseq taanna naleqqussorinnikkaluarlugu, ersarissumik ukiorpasuarneq oqaatigiuartarsimavarput pinerluutinut sakkortuunut aamma sakkortunerungaartumik pineqaatissiisalertariaqartugut.

Taamatut naatsumik Atassummiit oqaaseqarluta, suliap aappassaaneerneqartigani inatsiseqarnermut ataatsimiititaliamut ingerlateqqaarneqarnissaanut akuersaarpugut.

Qujanaq.